

Date – 27/06/2024

Time - 18:30 -18:40Hrs

## REGIONAL NEWS BULLETIN

### HEADLINES (EVENING)

- Aizawl Municipal Corporation ward number 19na By-Election ah ZPM candidate Dr C. Malsawmtluangi thlan tlin a ni.
- Economics & Statistics Department –in Mizote hma hun tur thlir chuan - kum upa, hna thawk thei tawh lo an pung anga, thalai hnathawkthei an tlem thei dawn a ni an ti.
- President Draupadi Murmu-i chuan hmarchhak hmasawwna tura sum ruahman chu tun kum 10 kalta chhungin a let lia tihpun a ni a ti.
- CBI chuan NEET-UG exam-a thil diklo titua puh mi pahnih vawiin khan an man.

<><><>

### AMC BY ELECTION

Aizawl Municipal Corporation (AMC) ward number 19 By-Election a vote tlate chu vawiin khan Aizawl DC Pisa-ah chhiar a ni a, Zoram People’s Movement (ZPM) candidate Dr C. Malsawmtluangi chu thlan tlin a ni.

ZPM candiate Dr C. Malsawmtluangi hian vote 3544 a hmu a, amah hnaih bertu Mizo National Front (MNF) candidate Dr. Lalrinzuali Hrahsel chuan vote 2502 a hmu thung a, an inthlauhna hi vote 1042 a ni. Indian National Congress (INC) Effie Vanlalhmangaihi chuan vote 1170 hmuin BJP candidate K. Vanlalruati chuan vote 102 a hmu thung.

Akashvani corr zawhna chhangin, thlan tlin tak Dr C. Malsawmtluangi chuan vote a hmuh zat chu a beisei aiin a sang tih sawiin vote sang chuangin a chak chu a lawm thu a sawi a, a bial tan tih tur a tam a, an bialah lei min a nasat avangin tui luankawr siamthat a ngai tih sawiin bial chhungah zan lama streetlight chhit tur neih that a pawimawh tih a sawi bawk a, bialtu hmasa in theihtawpa hna a lo thawh tawh sa chhonzawm mai tur a nih thu a sawi bawk.

ZPM Zonu Headquarters chuan vawiin khan thu chhuah siam nghalin, state rorelna kawngah hmeichhiate'n kut kuang kuah mai lova ke an pen chhuak zel chu lawmawm an ti a, reserve seat atang leh general ward atanga hmeichhe corporator thlan chhuahte chu hmeichhiate tana ram rorelna khawvela meichher chhitu an nih hria a, thahnemngai taka an rawngbawlna hlena ram rorelna kawnga taimak chhuah sauh sauh turin an ngen a ni.

Puan tawh angin AMC ward number 19-na hi hmeichhe bial a ni a, a bialtu hmasa Baryl Vanneihsang chu MLA atan a tlin tak avangin a hmun ruak luah tur thlan a a ni. Ward chhungah hian veng hrang hrang – Kulikawn, Tlangnuam, Tlangnuam Vengthar, Saikhamakawn, Melthum leh Hlimen te an awm a ni.

By-election-ah mi 7,342-in vote an thlak a, vote tla hi za zela 55.02 a ni. Polling station 15 awmin vote nei mi 13,344 zinga 7,342 (mipa 3,407 leh hmeichhia 3,935)-te'n vote an thlak a ni.

<><><>

## SCHOOL EDUCATION

School Education Minister Dr Vanlalhlana chuan hmasawna kalpui danah science ngaihtuah a tul rualin environment ngaihtuah tel a ngai a ni , a ti a.

He thu hi vawiina State Council of Educational Research and Training (SCERT) leh National Council of Education Research and Training (NCERT) in an buatsaih 42nd State Level Science, Mathematics & Environment Exhibition, SCERT tualzawl, Chaltlanga hun hmannaah sawiin School Education Minister chuan thiamna tuantling leh rintlak nei turin tan lak a ngai a ni, a ti a. Thalaite chu intuai hriam tura chahin, Al hmang thiam tura inpuahchah a ngaih thu a sawi bawk a, hmasawna kal chho mil zelin herrem thiam a ngaih rualin nakin hun lokal zel tura him lo laka fimkhur thiam pawh a tul tih a sawi bawk a ni.

42nd State Level Science, Mathematics & Environment Exhibition-ah hian School 13 atangin zirlai eng emaw zat an tel a, an thiamthil hrang hrang model 43 phochhuakin Edu Tech Exhibition Stall 9 siam a ni a, District 5 atangin zirlai an tel thei a ni.

<><><>

## ECO&STATS

Economics & Statistics Department Director Pu B. Lalrinhlua chuan tun dinhmun atanga Mizote hma hun tur chuan - kum upa, hna thawk thei tawh lo an pung anga, thalai hnathawkthei an tlem thei dawn a ni a ti.

Akashvani corr-in a kawmnaah, Pu B. Lalrinhlua chuan, Mizoram dinhmun siamtha tur chuan thalaite'n thu an awih a ngai, a ti a. Pathian thu awih bakah, ruihtheihthil tih loh leh nun uluk a ngai, a ti a. Kum upa, hna thawk thei tawh lote ngaihsak an ngai a, an hamthatna, rei tak an dam theihna turin mipui leh sorkarin a ngaihtuah a tul a. Khawvel ram hrang hrangte buaina ang zirchiang lova state a kal mawp mawp chuan, Mizote hma hun tur chu - kum upa, hna thawk thei tawh lo an inpel bek bek ang a, thalai hnathawk thei an tlem ang. Ageing Population a tawn theih a, thuawihna nena thalaite'n hun an hman chuan, Population Ageing thleng lovin, dinhmun tha tak, Mizote hian an tawng thei bawk, a ti a ni.

(BYTE)

Aizawl District bika pian leh thih dan, Economics & Statistics Dept. Civil Registration System-in a chhinchhiah danin, kum 2022 chhunga mipa piang zat chu 4817 a ni a, hmeichhia 4790 an piang thung. Kum 2023 chhungin mipa piang zat chu 4788 a ni a, hmeichhia 4540 an piang a. Kum 2022 leh 2023 a mipa piang kiamna zat chu 29 a ni a, hmeichhia piang kiamna zat chu 250 a ni. A pumpuia khaikhin chuan naupiang kiamna zat chu 279 a ni.

Kum 2022 khan mipa thi zat hi 2661, hmeichhia 1361 an ni a, kum 2023-ah mipa thi zat chu 2943 a ni a, hmeichhia 1295 an thi a. Mipa hi 168 in an kiam, hmeichhia 66 in an kiam thung a ni. Mipa leh hmeichhe thi zat kiamna hi 234 a ni.

Kum 2024 January atanga April thla thlengin mipa 1475 an piang a, hmeichhia 1406 an piang thung. Kumin January atanga April thla thleng khan mipa thi zat hi 842 a ni a, hmeichhe thi zat hi 436 a ni a, a vaiin mitthi zat hi 1278 a ni a.

Tun dinhmunah Economics & Statistics Dept hnuaiah hian Branch 8 a awm a. Chu'ng zinga pakhat chu Civil Registration System - piang leh thi bakah population chungchang chhinchhiaahna a ni.

<><><>

### **3 DIED- MELBUK**

Vawiin chawhma dar 11:00 vel khan, Champhai District, Indo Myanmar Border, Melbuk ram, Tiau lui a Balu lakna, feet 40 vela sei, feet 6 vela thuk leh feet 7 vela zau chu a chhunga Balu la an awm mek laia a chim avangin mi pathum (3) an thi a, mi pakhatin hliam tuarin Damdawiin ah enkawl mek a ni.

Mel buk atanga thu dawnnain a tarlan dan chuan Balu khur chimin a delh avanga thi te hi

Lalmalsawmdawnga, Kum 16 Melbuk khua, Laltandika, Kum 20 Tahan (Myanmar) leh almuankima, Kum 18 Melbuk khua te an ni a.

Lallawmsanga, kum 16 Melbuk khua chuan hliam na lutuk lo tuarin Champhaia Med-aim damdawiinah enkawl mek a ni a, a ngaihtuahawm lo niin thu dawn a ni.

Melbuk khua mi 2 te hi zaninah lu menpui an nih hnuah naktukah vuiliam an ni ang a, Laltandika hi an khua, Saikhua, Tahan bul., Myanmar ah phum turin vawiin tlaiah lak tur a ni.

<><><>

### **LADC VC& MDC BY ELECTION**

Tukin zing dar 7 atanga Lai Autonomous District Council huamchhunga Village Council inthlanpui leh Lawngtlai Chandmary MDC by election vote thlak chu boruak muanawmtak hnuaiah neih a ni a

LADC hnuaiah hian VC 99 awmin, Hmawngbuchhuah ah chuan inthlan chuh tura endikna (scrutiny) pal tlang zo an awm loh avangin inthlan buatsaih a ni dawn lo va; Saikhawthlir VC-a seat 5 awmah chuhtu 5 (INC 1 leh ZPM 4) awmin, khingtu dang an awm lova Village Council 97-ah inthlan buatsaih niin, voter tam zualna Village Council thenkhatah auxiliary polling station dah belh a nih avangin polling party 112 an awm.

Vawiin vek khan Lawngtlai Chandmary MDC by election ah Chandmary MDC bial mipui ten vote an thlak a, he bial ah hian BJP, MNF leh ZPM ten Candidate an nei a. Lawngtlai Chandmary bial MDC by-election ah hian polling station pali - Lawngtlai Chandmary North-I, Lawngtlai Chandmary North-II, Lawngtlai Chandmary South-I leh Lawngtlai Chandmary South-II - te a awm a ni.

VC inthlanna ah hian Ballot paper hman niin, MDC by election ah hian Electronic Voting Machine hman a ni thung a, VC inthlanna a Vote tlate hi Vote

thlak zawh ah tihfel tur pawimawh tihfel a nih hnu ah chhiar nghal niin, MDC by election a Vote tlate chu July 1 ah chhiar a ni ang.

Chandmary MDC bial ah hian Vote nei 2,798 (Mipa-1,313; Hmeichhia-1,485) an awm a, hriat theih chinah vote zaa 52.97 a tla a ni.

<><><>

#### **KOLASIB MJA**

Kolasib District Mizoram Journalist Association hruaitute chuan vawiin khan Kolasib Hmarveng-a Kolasib Agro-Marketing Cooperative Society Ltd (KAMCO) theitui sawrna hmun an tlawh a.

KAMCO hian Kolasib Hmarveng-a Pu C. Rokhuma huan ah Dragon Fruit leh Theiherawt sawrna khawl Packaging Solution bun in, tunlai hian Dragon fruit rah an sawr mek a, an sawr sa; a tui hi hrik leh natna laka him vek turin an um (fermented) a, chu chu litre khat Rs 100/- in an hralh thin. Dragon fruit rah hi Kg khat Rs 200 in an lei thin a, tunlai hi a rah tam lai anih avangin Kg ah Rs 100 in an lei mek a, kumin ah hian quintal 20 an lei tawh niin KAMCO hotute chuan an sawi.

KAMCO hotute chuan Dragon fruit hi ni khat ah quintal 5 an sawr thei a, an sawr sa, a tui chu litre 1000 dawng Tanky pathum ah an um thin a, a hralhna lamah harsatna a awm rihlo niin an sawi a. A tui an sawr bakah hian Dragon fruit rah hi Shillong, Gauhati leh Agartala ah Agent kaltlangin an hralh thin thu KAMCO hotute chuan an sawi a, an khawlah ah hian kum khat chhungin Dragon fruit quintal 50 atanga quintal 80 an sawr thei ani. Kumin hian Kolasib District ah Dragon fruit quintal 1000 vel a thar chhuah an rin thu an sawi baw.

KAMCO theitui sawr na khawl hi Uttar Pradesh atanga nikum a an chah thlen niin, khawl lei nan leh thil dang atan kum 2022-2023 khan FOCUS atangin Rs nuai 50 vel an hmu a, he khawl hian Dragon fruit bakah Theiherawt rah a sawr thei a, Theiherawt rah hi tualchhung ah Kg ah Rs 10 in an lei a, a tui chu litre khat Rs 100 in an hralh a, a um (fermented) chu ml 300- Rs 100 in an hralh thin thu an sawi.

KAMCO thei tui sawrna khawl hi ram pumah a awm chhun anih thu KAMCO hotute chuan an sawi baw.

(DIPR)

<><><>

#### **SPEAKER**

President Draupadi Murmu-i chuan hmarchhak hmasawna tura sum ruahman chu tun kum 10 kalta chhungin a let lia tihpun a ni a ti. Vawiina Parliament Joint Session ah he thu hi sawiin President Murmu-i chuan sawrkarin hmarchhak chu Act East Policy chhuahka turin theihtawpin hma a la a ti a. Zirna, hriselna, tourism leh employment lamahte hmasawna hna chak taka thawh a ni ta ti a. Assam ah semiconductor plant cheng vaibelchhe sing 2 sang 7 chaung sengin din mek a ni tih tarlangin hmarchhak chu ramchhunga chips siamna hmunpuiah a chang dawn a ti a. Hei bakah hian hmarchhaka remna tluantling a awm theih nan sawrkar laipuiin tan a la tih sawiin kum 10 kalta chhungin buaina tam takah inremna siam a ni a ti a. AFSPA pawh a tahtawlin hlih chhoh mek zel a ni a ti baw.

Pi Murmu-I chuan tunhnaia exam paper putru chungchangah dik taka chhui a ni ang a, mawhphurtute chungah na taka hremna pek a ni a ti a. Party politics boruak dah tha a, rampum huap hetiang pawikhawihna veng tura tan lak a tul a ti a. Exam buatsaihtu board te pawh siamtha turin hmalak anih thu leh dan khauh tak siam a nih

thu a tarlang bawk a ni. President chuan kumin Lok Sabha inthlanah Jammu & Kashmir mipuiten vote tlak that ber tum an siam thei chu ropui a tih thu a sawi a. Tunhma inthlan boruakah harsatna tam tak a thlen thin thu sawiin kuminah vote tha taka a tla chu lawmthu a sawi a ni. President Murmu-i hian ram hmasawna leh sawrkar hmalakna hrang hrang tarlangin tun kum 10 chhungin khawvela economy lian panganaah India a awm tawh thu a sawi a. Hrileng leh khawvel hmun hrang hranga inngirngona thleng karah he hlawhtlinna hi neih a ni a ti a. Khawvela economy lian pathumna ni turin sawrkarin theihtawp a chhuah ani a ti bawk. ni.

Hetihlai hian vawiina Joint Session-a President thusawi chu Opposition lam chuan sawiselin thil pawimawh ber ber retheihna, thil man sang leh hna nei lo tam lutuk chu a ngaihthah leh si an ti. Congress MP Tariq Anwar chuan chanchinbumite hmaah he thu hi sawiin sawrkar hlawhtlinna chauh an sawilang a ni a ti. Samajwadi Party hruaitu Akhilesh Yadav pawhin President thusawi chu sawiselin khawvela economy lian pangana anih chauh sawilangin hna nei lo an pung tual tual leh loneitute tawrhna chu a ngaihthah leh daih a ti a. Sawrkarin Agniveer Scheme a kalpui danah pawh zawhna a zawt let nghal a ni.

<><><>

## **CBI ON NEET-UG**

CBI chuan NEET-UG exam-a thil diklo titua puh mi pahnih vawiin khan an man. Thudawn danin heng mi pahnihte hi Bihar-a Patna atanga man an ni a. CBI te hian NEET-UG exama thil diklo an chhui tan atangin Bihar-a Economic Offences Unit (EOU) chu an tlawh ngahl a. Thubuai chhui hna an thawk nghal a ni.

<><><>